

## **Nuummi innuttaasunut immikkut nakorsiartarfeqalerneratigut nakorsiarsinnaaneq oqinnerulersinnaassanersoq pillugu apeqquteqaat aallaavigalugu oqallisissiatut siunnersuut**

(Atassutip Inatsisartuni ilaasortaaitai)

### **Akissuteqaat**

(Peqqinnissamut Naalackersuisoq)

Atassutip Inatsisartuni ilaasortaaitaasa oqallittoqarnissaanut aallarniinerannut qujanaq.

Innuttaasut Peqqinnissaqarfimmut attaveqaqqaarnerat sumiiffimmi peqqissaavimmi imaluunniit pinasuartumik nakorsiartarfimmi pisarpoq. Nuummi tamanna Dronning Ingridip Peqqissaaviani pisarpoq. Dronning Ingridip Peqqissaavia nunap immikkoortuani peqqinnissaqarfik Sermersuumut ilaavoq, pingaarnertullu Nuummi innuttaasunik peqqinnissakkut sullissisarluni, taamaattorli Paamiuni nakorsaqaarnissaanik Ittoqqortoormiini qarasaasiakkut nakorsiartitsissut aqutugalugu nakorsiartitsinermik ikorfartuisarluni. Tamatuma saniatigut oqaatigineqassaaq peqqissaavimmi nakorsat pisariaqassuseq naapertorlugu Narsami nakorsat piffissami sivikitsumi atorfeqartinneqartut ikorfartortaraat. Peqqissaaviup Dronning Ingridip Napparsimaviani inissisimanera innuttaasunut pitsaaqutitut isigineqarpoq, tassa nakorsiartarfimmi aamma nakorsaatini aallertoqarsinnaammat, tarrarsortittoqarsinnaammat aaversittoqarsinnaallunilu.

Naak Dronning Ingridip Peqqissaavia pingaarnertut Nuummi innuttaasunut atugassaagaluartoq pissarsiarineqarsinnaanera ullumikkut naammaginangitsoq Peqqinnissaq pillugu Ataatsimiititaliarsuarmit tikkuarneqarpoq. Nuummi peqqissaavimmik pissarsisinnanermut killiliisut arlalinnik tunngaveqarput. Peqqinnissaq pillugu Ataatsimiititaliarsuaq inerniliivoq, nalinginnaasumik katsorsaanermi nakorsatut immikkut ilinniarsimasut amigaataanerata pingaarnertut ajornartorsiutaasoq, peqatigaluguli ersersinneqarpoq assersuutigalugu amimut isinullu tunngatillugu katsorsaanermi peqqissaavik nuna tamakkerlugu akisussaaffinnik kivitsinissamut isumalluutini atuisartoq. Sinerissami sulisut pisarialinnik piginnaasallit sulisoriinnassallugit ajornakusoormat maanna peqqissaaviup nuna tamakkerlugu isumaginnittariaqalersimavoq.

Ukiuni kingullerni Nuummut nuuttut amerliartorsimapput, tamannalu nakorsanit annertusiartuinnartumik sullinneqartariaqarnermik kinguneqarsimalluni. Nuummi innuttaasut amerliartornerat peqatigisaanik peqqissaavimmi sulisut pisariaqartinneqartut amerliartorsimangimmata Dronning Ingridip Peqqissaavia tatineqalersimavoq. Tassungalu atatillugu nunap immikkoortuinut allanut sanilliutissagaanni Peqqinnissaqarfik Sermersuumi isumalluutiniq agguasarnermi equngasoqarnerata pineqarnera Peqqinnissaq pillugu Ataatsimiititaliarsuarmit tikkuarneqarpoq. Taamaakkaluartoq assersuutigalugu innuttaasuniit saaffiginnissutit isumagilluarumallugit nutaamik oqarasuaatikkut aqqissuussinikkut peqqissaaviup pissarsiarineqarsinnaanera pitsanngorsaaviginiarneqarsimagaluarpog, sulili oqarasuaatikkut ornigullunilu nakorsiarniarluni sivilisumik utaqqisoqarsinnaasarpog. Nuummi innuttaasut peqqissaavimmut pitsaanerumik pissarsiarinnissinnaaniassammata Naalackersuisut ukioq manna Pinasuartumik aningaasaliineq 1-imut atatillugu 3,5 mio.kr.-nik immikkoortitsisimapput, tamannalu 2023-mi pitsaasumik sunniuteqarsimalluni.

Peqqinnissaqarfimmi isumalluutiniq agguaanissaq pillugu oqallinnerit imaannaanngitsuupput. Innuttaasoq illoqarfimmut allamut nuukkaangat aningaasat nunap immikkoortuanut allanut nuuginnarsinnaanngilagut. Peqqinnissaqarfiup peqqinnissamut sullissineq attatiinnartussaavaa

nunatsinnilu sumiiffinni tamani peqqinnissamut sullissisussaallutik, naak inuit ataavartumik nikerartaraluarpata. Ineqarnermi pissutsit aamma sulisut sulisoriinnarnissaannut assut pingaaruteqarput, tamannaavorlu Naalackersuisut ukkatarisaasa ilaat. Taamaattumik Naalackersuisut siunnersuuteqartoq isumaqatigaat, tassa Nuummi innuttaasut ukiuni tulliuttuni amerliartuinnarnissaat naatsorsuutigineqartariaqarmat innuttaasunut ataavartunik aaqqiissutissarsiortariaqarpugut. Peqqinnissaq pillugu ataatsimiitsitaliarsuup innersuussutaanik sulineq aallartereerpoq tassaniiporlu peqqinnissamut tunngatillugu pingaarnersiulluta politikikkut ataatsimut sulinerput.

Taamatut oqaaseqarlunga oqallilluartoqarnissaa qilanaaraara.